


飛錫凌空日記

397

42




始



飛錫凌空日記

397-42



不來茶表

忍山林貪懶眠老
飛錫向幽燕休言
飯尋常事一片微
在此篇

峻峯日勝自題




大正
9.10.20
内交



飛錫凌空日記

大日本東京

中里日勝 峻峯 譔



大正庚申五月。日本圖書館協會將開本年度總會於南滿洲大連。余亦欲往而
 參之。兼探燕趙齊魯之勝。以是月二十一日發。是日陰。午前四時起。昇堂禮世尊。
 讀經唱題。以祈天下寧靜。國豐民安。皇道遐昌。佛日增輝。及海外出游。一路平安。
 六時喫飯。杖錫出門。口占曰。遠游萬里出鄉關。海外何患行路艱。欲養文章豪快
 氣。大川過去又名山。八時抵東京驛。橋井石川栗山諸氏先在。俱乘瀛車發驛。雜
 談諧謔。屢發大笑。午後四時十五分。抵名古屋驛。下車。少時逍遙傍地。抵大垣驛。
 暫停車。更進過米原驛。從是以西。距京都數十里。山丘躑躅花與水田紫雲英。紅
 紫競妍。滿目如錦繡。抵大阪驛。買寢臺就蓐。隣室有二婦女。至更闌猶喃喃饒舌。

甚可厭焉。過岡山驛。推窗仰天。快晴可喜。乃吟曰。推窗望碧落。星斗粲虛空。明日好天氣。心安臥榻中。是夜移蓐不能眠。心氣朦朧。

二十二日晴。午前四時起。大聲祈禱。誦經唱題。同行及隣室皆驚起。時宿霧散。紅日出。嚴島風光歷歷。爽快不可言。九時五十分。達下關海口。舍汽車移汽船對馬丸。解纜向朝鮮。午後九時四十分。着釜山港。是日無風。恬波熨平。萬燈落水。光景如畫。舍船抵高砂街。投逆旅松本。發書信於東京。

二十三日晴。煖氣大加。可比東京。六月。午前五時起。誦經唱題祈禱如例。九時四十分。迎日本圖書館協會員九十五名於釜山港棧橋。相見慶。一行平安。既而巡視市街。訪龍頭山圖書館。館長柳瀨氏大喜。具茗殮。間談移晷。歸逆旅。午後書日記復發信書於東京。六時喫餐。雜談多時。十時就寢。

二十四日晴。午前五時起。誦經唱題祈禱如例。朝餐後訪西街妙覺寺。而辨教務。

享餐。午刻還逆旅。買自動車。遊東萊溫泉。日晡歸逆旅。晚餐後。逍遙市街。

二十五日。午前五時起。誦經唱題祈禱如例。九時過港口棧橋。一行點呼已畢。乘汽車向京城。經大邱。大田。水原。諸驛。午後八時。達京城。逆旅曰巴城館。就宿焉。

二十六日晴。午前五時起。誦經唱題祈禱如例。而朝浴時。有誤着余犢鼻禪者。跡而求還之。其人頑乎不應。余因徐辯明其同異。終屈伏乞宥。一行大笑。訪總督府。聽談政要。登南漢山。眺矚絕佳。全京風色聚一眸下。觀鐵道學校。付屬圖書館。零時三十分。滿鐵會社。見招於明月館。有盛饌。觀動物園。植物園。博物館。藏書閣。於昌德宮中。攝影於映花堂前。以爲紀念。歸逆旅。時驟雨。翛然至。炎塵一掃。快甚。八時。開講演於日出小學校。聽衆甚多。尤爲盛會。十一時。汽車發南大門驛。向奉天。終夜苦熱。殆不能睡。

二十七日。午前五時二十分。抵平壤。車止須臾。盥漱整衣。誦經唱題祈禱如例。八

時抵定州開行厨是滿鐵會社所贈也。更進過新義州。此地開市雖爲日尙淺。亦已極殷賑。渡鴨綠江對岸卽滿洲也。十一時抵安東。實爲鮮滿國境。有稅關而檢行旅。適檢時錶。進針一小時許。蓋因經緯度差然也。午後一時餐於鷄冠山。觀鳳凰城釣魚臺諸勝。七時達奉天。乃舍車逍遙市街。旋向大連發。徹宵不寐。

二十八日晴。氣溫益昂騰。午前五時起。誦經唱題祈禱如例。八時着大連。投信儂街。遼東旅館發信書於東京。十時三十分。開日本圖書館大會於滿鐵會社圖書館。衆皆攝影。以爲記念。晝餐後。巡視中央試驗所。窯業課。沙河口鐵工場。星浦莊園地。日晡赴滿鐵會社招飲于大和旅館。盡歡而歸。

二十九日晴。煖氣增加。午前五時起。誦經唱題祈禱如例。十時開協議會於滿鐵圖書館。議開國際圖書館大會可否。而其事體頗爲重大。議亦不容易決也。乃約托諸協會。研尋得失。更爲審議。午刻東亞圖書株式會社見招於大和旅館。午後。

逍遙市街及公園。四時開講演於大連第四小學校講堂。是亦爲盛會。夜赴旗亭。共和樓是民政署市役所商業會議所聯合所招邀也。十時歸館。細雨瀟瀟。達曉睡味殊可也。是夜一行中某酩酊。從樓上而落。使人寒膽。因口吟曰。胡藤花如雪。大連薰風新。老人樓上落。不是龍塞春。某奉儒教之人。而如忘孔子所謂惟酒無量不及亂者。何不用意之甚也。程子曰。讀論語。有讀了全然無事者。蓋某之謂歟。三十日雨。午前五時起。誦經唱題祈禱如例。七時五十分。乘汽車抵旅順。時雨始止。先弔二百三高地戰跡。有詩曰。十八年前奈大艱。乾坤一擲廢興關。諸君此處不酣戰。豈伍卽今強國班。而巡視白玉山表忠塔博物館。滿蒙商品陳列館。要塞戰記念陳列館。東鷄冠山北堡壘等。就旗亭福壽喫午餐。四時五十分。還大連。客次夜逍遙市街。十時伸雙脚而臥。涼雨復至。清爽襲人。

三十一日陰。午前五時起。誦經唱題祈禱如例。九時三十分。吾一行乘汽車復向

奉天午後一時餐瓦房店道經南山金州大石橋遼陽首山沙河等戰跡及鞍山製鐵所製鐵所將來所獲應一歲製出百萬噸云其規模壯大可知九時着奉天投逆旅大丸

六月一日晴午前五時起誦經唱題祈禱如例朝餐後逍遙市街歷觀地方事務所圖書館小學校公園忠魂碑赴醫學堂見供午餐午後二時開大會議於中學堂畢開講演聽衆甚多七時赴總領事所首唱官民聯合歡迎會十時歸逆旅
二日晴午前五時起誦經唱題祈禱如例朝餐後觀北陵午後歷覽奉天宮殿東三省立女子師範學校同圖書館等奉天教育廳長謝蔭昌氏奉天省教育會會長孫其昌氏等供盛饌夜歸逆旅而日本圖書館協會總會及講演視察等事以是日告終焉

三日晴午前五時起誦經唱題祈禱如例發小包郵便及信書於東京是日與總

會一行分手與同志九人市島謙吉、橋井清五郎、栗山清太郎、坪谷善四郎、今井貫一、永田好三郎、吉田龜壽、那須源吾及余也俱遊燕京十時五分由京奉鐵路向北車中所矚目曠野茫茫不知其邊際而所至之車站見乞人成群叩頭百拜以乞錢不快甚矣時烈風捲沙天地晦冥不辨咫尺所謂紅塵萬丈者於是乎信矣既而驟雨沛然至道路忽變成川有詩曰東西南北自無邊無木無山無竈煙伊古以來來往道晴成通路雨成川蓋道路不修自古而然故凹爲壑狀雨則成川也九時抵山海關

四日晴午前五時起誦經唱題祈禱如例七時抵天津就常盤旅館一浴洗塵喫朝餐逍遙市街歷觀李鴻章廟及曹錕總督邸船越總領事供饌權談移時午後四時復乘汽車發八時三十分達北京投宿北京飯店

五日晴午前五時起誦經唱題祈禱如例九時吾一行相率訪使署以表敬意德川書記官款接頗勤致謝而出詣雍和宮卽喇嘛寺寺在清朝時殊見眷遇極爲

八
殷盛革命變作。俄然致衰頹。殿堂門廡。金碧剝落。蛛網縱橫。塵埃堆積。圓顛數百。殆如乞人。洵可憫惜。謁孔子廟。結搆嚴翼。使人不覺正襟。廟門曰大成門。門內藏石鼓。周宣王時所造。韓昌黎蘇東坡皆有歌。見于其集。觀鐘樓及鼓樓。亦爲壯偉。十二時還飯店。午後二時觀紫禁城。乃元明清帝王所居。集數朝之力而所成。其壯觀非筆墨之所能悉也。時值陰曆五月五日。縱觀所藏書畫器玩。此皆本置于熱河離宮者。今移在此。神品奇物。不可勝數。款監無既。歸途訪土屋禎二君於西城。嘎哩衙衛。見供盛饌。款待備至。八時歸飯店。浴後書日記。九時就寢。是夜不寢。乃援筆書所見曰。佛法教化於人。人有貴族。有凡民。爲法師者。獨教化貴族。則雖得一時之榮。然不能免異日之衰。汎教化凡民。則雖不得一時之榮。然能免異日之衰。宜不先教化貴族。而爲先教化凡民。佛法大旨。不在求財利。而寔在施慈悲也。苟爲法師者。毅然自任。不惑於一時榮利。而使其教法超卓于俗界風波漂蕩

九
之外。可也。不然。己先貪浮榮也。何以能禁法子法孫之爲非哉。柔懦虛飾。諂諛卑屈。爲風成俗。學問不講。德行不修。不復知樹下石上艱苦爲如何也。此輩一朝猝遇世變。譬如温室花卉。忽觸野外寒氣。枯萎凋落也。可不畏哉。可不誠哉。我祖蓮公。當立宗之始。其教化方法。不爲先貴族。而爲先凡民。是與傳教弘法諸師之所爲固異。其撰而當時教化之施。其艱苦。雖非筆舌所盡。遂使其教法無後世之衰。巍然屹立。天地竝存。真可謂千古卓見。萬世師表矣。余來北京。觀察喇嘛教情態。殊有不禁感慨者。彼其全不解佛法奧旨。違背佛陀弘範。徒甘施者殊遇。優游屢足。悅目前之榮華。而忘盛者必衰之理。知有貴族。而不知有凡民。一朝變作。上下顛倒。幾與清廷俱傷共廢。將不可復救也。悲哉。頃者希臘教尼固萊。在我東京者。俄國之亂。與其帝室魯麻能布氏。亦俱罹災厄。如不可起者。是皆雖曰其自業自得乎。吾儕以宗教爲任者。潛然不能無一掬淚。嗚呼。世之爲法師者。可不深省哉。

六日晴。午前五時起。誦經唱題。祈禱如例。朝餐後。驅馬車遊萬壽山頤和園。壯麗
雄偉。天下無雙。清朝時。傾倒國家杼軸以成。此盛觀。如佛香閣。則金碧燦爛。巍然
聳雲表。莊嚴無可比者。西太后祈延壽處。有詩曰。天上富貴致人間。瑰璋珍寶堆
於山。倚伏隨時禍福變。榮枯展轉旋似環。不知五衰剝邦至。大劫百千彈指比。秋
天明月春園花。羽觴飛去空一醉。秦皇漢武求神仙。壽夭有命誰能遷。求之不得
同懊惱。太后心事真可憐。佞佛休修偽善業。如來澹泊奈賽錢。萬壽山上香閣裏。
禱壽無量壽佛前。聞此園。團匪亂後。極荒涼矣。西太后敕。轉用海軍擴張資。以加
修繕。復舊觀者也。嗚呼。治國者。不充實國防。而虛飾是務。不亡何爲。十二時。餐於
石舟中。石舟。以大理石造舟形。以枕昆明湖中者。風色殊佳。顧望移晷。遂泛舟於昆明湖上。歸路過玉泉
山古華嚴寺。卽清廷離宮。康熙十九年所建。趙揆和尚住持于此。北京聖感寺住
持趙永和和尚著五燈全書一百二十卷。趙揆和尚校訂。且爲序。以進康熙帝。帝深

爲嘉尚。人所周知。今以此質主僧。主僧無所知。其無識可笑。此山最高處。有大理
石七重塔。通體刻諸佛像。最極精巧。遊大液池。瓊華島。登白塔。風光絕佳。觀中央
公園。園本社稷壇也。老柏鬱蒼。古色可愛。日暮脚力漸疲。猶鼓勇。癸天壇壇。歷朝
天子所祈年。結構宏麗。亦可驚。晡時。歸飯店。
七日晴。午前五時起。誦經唱題。祈禱如例。朝餐後。訪趙爾巽氏於清史館。此清朝
歷史編輯處也。聘學者一百五十人。所聚參考書籍。稱十二萬卷。拮据彈精。期其
成功云。是日教育部次長傅岳芬氏。見饗於東興樓樓。北京頭番旗亭也。食前方
丈。列山海之珍。快談如湧。獻酬移時。臨去。傅氏問余之本色。以身着歐服。口說佛
典也。乃以詩答曰。我亦乾坤尊特賓。三衣一鉢自由身。憂時慨世慈悲淚。講道論
文佛學人。翠柳紅花窺實相。行雲流水悟天真。凌空錫杖聽然去。壞色袈裟豈着
塵。傅氏一誦。破顏微笑。訪北京大學長蔡元培氏於北京大學。供茶菓。觀大學圖

書館藏書頗多。訪京師圖書館長張宗祥氏於京師圖書館迎接殷勤。此館古書善本最饒多。出示唐宋元明諸版本及諸名家筆跡。而以北魏大安四年四月三日唐兒祀法牧所供養寫經爲最古。見贈善本目錄四卷。晚歸飯店。八日晴。午前五時起。誦經唱題祈禱如例。以明日去京故。歷訪使署清史館教育總長及諸知友告別。既畢遊瑠璃廠。觀骨董舖。購筆墨扇子書籍歸。晚餐後。理行李。是夜亦不寐。乃援筆艸一論曰。邦人遊支那者。開口輒說兩國親善。從政客紳商至學者教家皆然。兩國果可得親善乎。以余觀之。今之所謂親善者。可言而不可行也。何以言之。曰。我國民口之殖。年不下八十萬。衣食窮乏。隨而益甚。故其生活之道。求之於海外。遠自南北兩美。及南洋諸島。況支那朝鮮之近乎。其既已沿南滿洲鐵路而住居者。產子女亦年不下一萬。加之年年自內地移居者。又五六萬人云。其勢如浩氣澎湃。沛然不可得禦。而彼我人民。俗異習慣。風殊文野。利害

相反。得失易地。乖離疾視。嫌隙日深。或排斥我貨物。甚則敢爲虐殺放火。而不顧爲政者不及今善處之。則其禍未可知也。雖然今日卒然。使我民在彼地者。一朝復歸內地。其情不可得爲也明矣。況我民不住彼地。則他人代住。逼迫彼民更有甚於今日者乎。又況支那政府。政權動搖不常。而不能自保其民者乎。其民之生命財產。將安寄託也。卽其一例以證之乎。如其政府所行紙幣。信用掃地。民獲之輒直易硬貨。以爲緩急遁逃之備。戰戰兢兢。朝不測夕。岌岌乎危哉。是故我國以其隣邦而恤其憂。又救其危。勇往邁進。與其上下披誠輸情。假力濟乏。以能樹立確乎不拔之威德。而慈眼平等。視彼民猶視我民。使之聊生樂業。各得其所者。是我天職也。是我仁義也。且支那國民。本深藏利己之心者。知有己而不知有國。其平生說報國盡忠也。與蓄音器發聲奚擇。故苟有能使之聊生樂業者乎。衷心懽迎。不問其爲何人也。則彼輩簞食壺醬。以迎我也必矣。昔者我祖蓮公。首唱妙宗。

圖使四海歸一妙法。佛法既然。世法豈亦得不然乎。遊支那者。宜先務竭心思于此也。如其兩國親善。不言可也。

又曰。余抵北京日。欲觀支那政府教民之意。先購學校教課書。閱至歷史第四冊。實有難忍容之語。曰。日本乘歐戰之隙。攫取德國租地膠州灣。即青島我國政府請

其撤兵。日本即提出二十一條之約。邀我承認。其最後通牒。膠文書也。時在五月七日。限二十

四小時答復。限期五月九日是為國恥紀念日。政府為和平之計。忍痛允許。實留民國之後患。而其

後又列舉所謂二十一條約。教者以此教之。學者以此學之。以使國民齊發公憤。

其他諸書亦往往列排日文字。以寓報復之意。宜哉。頃者排日騷擾。悉由學生而
行。事情如此。彼說親善者。其果知之乎。抑不知知之乎。不知則迂濶無甚焉。知而默
止。則其說親善。實徒勞而已矣。苟欲謀親善。則不如使彼政府速改正其教育方
法之為愈也。否則爛舌以說親善。將何益。其事如是。而所謂唇齒輔車之義。惡乎

在也。聞昔者法國為德國所敗也。教其國民以報復之意。以故五十年後。遂能合
英美之力而成其志。是豈非可鑑哉。若不速為之處置。則他日必有噬臍之悔。有
志者三思焉可也。

九日晴。午前五時起。誦經唱題祈禱如例。今井永田兩氏猶滯京。將游閩粵。於是
一行減為七人。驅自動車抵正陽門停車場。土屋君來送吾行。八時三十分。投汽
車發。由天津轉乘津浦鐵路。午後一時。抵泊頭鎮。八時三十分。達濟南。投逆旅鶴
屋。是夜熱氣如蒸。枕上夢難圓矣。

十日晴。午前四時起。誦經唱題祈禱如例。是日欲登泰山。持行厨二食。八時乘汽
車。進入山東境。即望見泰山。山巔高入雲際。十時抵泰安。則山麓矣。雇轎行一里
許。為一天門。崖上皆植小松。杏樹夾路。駢植。又行一里許。過迴馬嶺。榆木橋。觀白
鶴泉。抵斗母宮。眼界豁然。山東縣邑。皆集于履。寫下矣。時方正午。開行厨。回視兩

崖如削壁。峩峨巖石。纍纍欲崩。磴道八千級。逶迤似羊腸。右望經峪。進抵山腹而憩。土人燒牛柴煎茶以薦。更進觀珍珠瀑。滌慮亭對松閣。朝陽洞奇勝。竟達南天門。謁碧霞宮。巡覽東嶽殿。養雲亭。攀登玉皇頂。有數石排土崛起。是爲嶽巔。窮探斷碑殘碣。徘徊不知時移。購泰山道里記。及金剛經拓本。山上有日觀峯。嘗聞拂曉登峯東望。見白雲朱霞搖曳半空。久之。紅旭突現眼前。若自海中踴躍而出者。俗謂之浴日。又聞禹域大山。稱五嶽。五嶽者。東嶽泰山。南嶽衡山。西嶽華山。北嶽恆山。中嶽嵩山。而泰山最顯著。蓋以孔孟生山東而屢稱之也。且古人說地理。亦未精。以爲域內大山無過泰山。其實不知山之最大者當首推崑崙。其最高處一萬七千餘尺。而泰山五千二百餘尺。未能達其半耳。崑崙在西藏之北。其山脈東者。分爲三支。北支起青海之北。經蒙古滿洲達山東。泰山屬焉。中支起青海之南。經甘肅陝西山西入河南。恆山華山嵩山皆屬焉。南支起西藏之東。經雲南貴州至

湖南衡山屬焉。此堪輿家不可不知也。午後七時。下山還泰安。休憩移時。因賦登嶽詩曰。岱宗天下勝。道里夙所稽。我欲發幽秘。曳杖跋樵蹊。崑窟刻奇字。洞天響仙雞。仰瞻白雲嶺。俯瞰積翠谿。飛泉懸絕壁。瑟瑟轟鼓鞀。松濤起天半。寒籟颯淒淒。磴道三萬級。磴級八千。支那人號曰三萬三千級。恍似攀雲梯。遂極玉皇頂。超然塵界睽。眸中大千在。平等山河齊。颺颺欲飛錫。群品履下低。十一時三十分。乘汽車。十一日午前一時三十分。抵曲阜。宿支那逆旅。和豐貨棧。臥高梁牀上。冷雨瀟瀟。客懷淒然。十一日晴。午前四時起。誦經唱題。祈禱如例。晨薦支那菜。無味殆不可食。強喫一椀。驅馬車。訪孔子舊跡。壞路凹凸。車不施彈力。其動搖甚。譬如舟行怒濤中。道程五里許。渡泗水。抵至聖林。稱廣袤十六萬步。繚以垣墻。入樓門。過洙水橋。達正殿。殿後有碑。題曰大成至聖文宣王之墓。而孔氏七十餘世墳墓亦皆在此。古柏蕭森。苔碧氣冷。使人不覺起敬。入約禮門。謁顏子廟。廟安復聖顏子神位。雍正帝額

曰德冠四科有陋巷井即顏子舊宅趾入同文門則有奎文閣及杏壇過大成門達大成殿拜跪已畢竊惟夫孔子之聖尙不得行其志於當時況吾輩乎感慨之餘賦一詩曰生涯抒海志終遠濟世無功已落暉今日頽風誰克振滔滔天下道心微仰瞻殿上安至聖先師孔子神位揭萬世師表斯文在茲等敕額殿後有一廟安至聖先師夫人神位又有孔宅故井碑其他歷朝帝王及名家諸碑不遑備指惜此行日時有限不得遍覽匆匆歸曲阜驛午後二時乘汽車發六時至濟南買車一巡城市投逆旅嗚呼此行眠不安食不給艱苦不可言是夜一睡不知東方之既白也

余閱史記曰孔子卒葬魯城北泗上今遊曲阜謁孔子冢冢距洙水僅咫尺而泗水距冢二里許然則葬孔子不在泗上而在洙上世家記事誤矣

十二日晴午前五時起誦經唱題祈禱如例八時乘汽車發濟南午後八時三十分着青島投宿吾妻旅館是日登泰疲勞猶未愈車中時時假寢而過既入山東境有山有水田野開鷄犬聞大異于滿蒙荒漠之地故支那人開口輒曰回復青

島與其今日曰回復孰若初不使德國據青島也夫德之據山東實東洋之禍根也支那人不能掃蕩而我國驅逐之彼欲以口舌奪取之何厚顏之甚也我費銷國帑二億喪失生靈二千以爲東洋防禍塞亂而使世界速成平和是支那人之所不能爲今不是之察徒欲以口舌與我爭曲直是非狎我則侮我也狎者不可使數侮者不禦可乎

十三日晴午前五時起誦經唱題祈禱如例驅自動車禮拜青島神社忠魂碑歷覽礮臺戰場市街等其疾如風既歸理行李乘汽船臺北丸別于吉田那須兩氏兩氏欲遊浦鹽也於是一行又減爲五人十一時解纜於青島阜頭海上波穩如席船中人人快談縱橫午餐後逍遙甲板或橫臥艙室

十四日雨午前五時起誦經唱題祈禱如例是時低氣壓至濃霧鎖海雨猛風荒船體動搖漁笛屢鳴進行甚遲遲船長曰一時投錨於濟州島近旁可以避難但

達馬關應遲一日。船客皆失望。過午霧漸稀薄。日光始漏。須臾濃霧復起。乃投錨停泊。是夜船客中有藝人。各演長技。因與纏頭金壹圓。

十五日。雨。午前五時起。誦經唱題祈禱如例。雲霧濛濛。船猶停泊。船長某請詩畫為作七古一篇曰。歸帆東指扶桑天。渺渺積水望茫然。平生難測乾坤變。人間夙要心膽堅。霧鎖太虛何黯澹。海若怒號尾閭顛。激浪排空風雨晦。一夜避險木浦邊。舟師盡心通濟術。吾儕賴此安眠圓。個中亦有弘誓意。三乘度來一乘船。午餐後。與隣室往來談笑。殊不寂然。

十六日。陰。午前五時起。誦經唱題祈禱如例。八時船抵馬關。關吏檢疫無事。移乘小汽艇。由門司登岸。又經稅關。將乘汽車赴豐後別府。先是坪谷氏電報一行之。至於逆旅溫泉龜之井。龜之井主人既待一行。在停車場直驅自動車。抵主人之屋。一浴洗濯。征塵頓有蘇生之思。飽餐醫榻腹。逍遙市街。是夜發信書於東京。

十七日。晴。午前六時起。浴溫泉。少焉一佳人來同浴槽。因竊口吟曰。攪破巫山夢。東窗日已紅。雲鬢猶未理。先浴玉泉中。既而覺破不綺語之戒。草遽出浴。讀經以懺其罪障。巡歷公園物產陳列場。觀海寺八幡地獄等。還逆旅。逆旅主人躬親為東道。驅自動車。歷視大分城市。觀古松於威德寺。偃蓋數十弓。蒼翠欲滴。蓋千外物。歸後浴溫湯。浴罷對饌。心情陶然。所謂千品甘露。百花珍藥。嘗醍醐妙味。遊極樂世界。恍乎如得。卽身是佛真果者。有詩曰。一生守拙不趨危。山水逍遙獨自怡。安養淨邦應在近。靈泉浴後舉杯時。杯非酒杯。即香醪液杯也。

十八日。雨。午前五時起。誦經唱題祈禱如例。朝餐後。逍遙市街。午後二時。乘汽船紅丸向神戶。逆旅主人殷勤送別。

十九日。陰。午前五時起。誦經唱題祈禱如例。應船長猿田某之請。作獼猴捉月圖。題詩以與焉。其詩曰。一實如如理。明月水心痕。什麼獼猴手。欲捉蟾蜍魂。午後二

時着神戶。投逆旅後藤市島氏先向京都發。余乃電報明日歸錫於東京。晚餐後與栗山氏別。此人壯年俊秀畫師也。臨別書懷以似之曰。佩服君之斯道忠彩毫能寫北清風。老僧別有大圓鏡。禹域山河方寸中。九時上瀛車寢臺。一睡向東京。二十日陰。午前五時起。在車中誦經唱題祈禱如例。閱新聞紙數種。十二時達東京驛。與橋井坪谷兩氏分手。諸弟子來迎。乃驅自動車歸山。時午後零時四十分也。直掃征塵。肅整儀容。昇堂仰禮世尊。讀經唱題。以謝無事廻錫。又謝留守諸人。

大正九年十月一日印刷
大正九年十月十日發行

(非賣品)

飛錫
凌空
日記

著者兼發行者 東京市赤坂區一ツ木町六十番地 中里日勝
印刷者 東京市赤坂區表町二丁目六番地 太田音次郎

印刷所 東京市神田區今川小路三丁目二番地 株式會社 一匡印刷所

397

42

終